

<><><><><><>

Amit Shah Omar

मुख्यमंत्री ओमर अब्दुल्ला होरें कल केन्द्री गृह मंत्री अमित शाह हुंदे'नै मलाटी करियै केन्द्र शासित प्रदेश कन्नै सरबंघत बक्ख-बक्ख मामलें पर चर्चा कीती जिंदे च तौले राज्य दा दर्जा ब्हाल करने दा मामला बी शामिल हा। मुख्यमंत्री दा औहद्धा सांभने परैन्त ओमर हुंदा एह नमीं दिल्ली दा पैह्ला-पैह्ला दौरा ऐ। मगरा उनें आखेआ जे ओह शिष्टाचार दे नाते गृह मंत्री हुंदे'नै मिले ते प्रदेश दी स्थिति बारै उनें'गी जानकारी दित्ती। हासल रिपोर्टें मुजब मुख्यमंत्री ओमर अब्दुल्ला होरें राज्य दा दर्जा ब्हाल करने दे मामले पर बी चर्चा कीती ऐ। दिल्ली दे अपने दौरै दरान मेद ऐ जे ओमर होर प्रधानमंत्री नरेन्द्र मोदी हुंदे कन्नै बी मलाटी करडन। उंदा एह दौरा गांदरबल जिले दे गगनगीर इलाके च होए दे आतंकवादी हमले दी पच्छोकडै च लग्गा करदा ऐ जेह्दे च आतंकवादिएं 7 बेदोसे लोकें दी हत्तेआ करी दित्ती ही। 2019 च जम्मू-कश्मीर गी केन्द्र शासित प्रदेश च तब्दील करने दे बाद थमां गै पुलस बल केन्द्री गृह मंत्रालय दे अधिकार हेठ ऐ। मुख्यमंत्री हुंदी प्रधानता तैह्त्त पिच्छले दिनें लाई गेदी मंत्रिमंडल दी बैठका दरान इक प्रस्ताऽ पास करियै केन्द्र सरकार गी एह गुजारिश कीती गेई जे जम्मू-कश्मीर दा राज्य दा दर्जा ब्हाल कीता जा। लेफ्टिनेंट गवर्नर मनोज सिन्हा होरें बी इस प्रस्ताऽ गी मंजूरी दित्ती ही।

<><><><><><>

Ganerbal Attack Photos

जम्मू कश्मीर पुलस नै गांदरबल जिले च ऐतवारें होए दे आतंकवादी हमले च शामिल विदेशी आतंकवादिएं दे फोटू जारी कीते न। एह फोटू गगनगीर इलाके च कैप अंदर लाए गेदे सीसीटीवी कैमरें दी रिकार्डिंग दे आधार पर तैआर कीतियां गेइयां न। पुलसै नै आखेआ हा जे 2 विदेशी आतंकवादी जंदे ऐतवारें संझा'लै गगनगीर इलाके च कम्मगारें दे शिविर च दाखल होए ते उत्थे मजदूद बेदोसे ते निहत्थे श्रमिकें पर अन्नबाह गोлияं चलाइयां। इस बुजदिलाना हमले च 7 लोक मारे गे जिंदे च इक मकामी डाक्टर ते 6 घाटी थमां बाहरा आइयै उत्थें कम्म करा'रदे लोक हे। इंदे अलावा इस हमले च 4 जने जख्मीं बी होए दे न। इस आतंकवादी हमले दे सरबंघै च अजे तगर 40 शा बद्ध लोकें कोला पुच्छ-गिच्छ कीती गेई ऐ। इक वरिष्ठ अधिकारी दी अगुवाई च एनआईए दी टीम नै बी घटना आहली थाहरै दा दौरा लाया ते किश महत्वपूर्ण सबूत किट्टे कीते।

<><><><><><>

Tral Terror Attack

आतंकवादिएं अज्ज बड्डलै पुलवामा जिले दे त्राल इलाके च उत्तर प्रदेश दे इक श्रमिक गी गोली मारियै जख्मीं करी दित्ता। बिजनौर दे बसनीक शुभम कुमार गी अज्ज आतंकवादिएं बाटागुंड ग्रांऽ च गोली मारी जेह्डी उसी बाहीं पर जाई लग्गी। हमले दे तुरत मगरा उसी इलाज लेई अस्पताल लेता गेआ। पिच्छले इक हफ्ते दरान कश्मीर च गैर-मुकामी श्रमिकें पर

होए दा एह त्रीया आतंकवादी हमला ऐ। एहदे शा पैहले जंदे ऐतवारें गगनगीर इलाके च इक निर्माण थाहरै पर होए दे आतंकवादी हमले च 6 गैर—मुकामी श्रमिक ते इक मुकामी डाक्टर दी मौत होई गई ही जिसलै के जंदी 18 अक्तूबर गी शोपियां जिले च आतंकवादिएं बिहार दे इक श्रमिक दी गोली मारियै हत्तेआ करी दित्ती ही।

<><><><><><>

Jammu Secretariate

जम्मू कश्मीर सरकारै सब्बने प्रशासनिक सचिवें ते बक्ख—बक्ख मैह्कमें दे प्रदेश स्तर दे प्रमुखें गी हुक्म दित्ता ऐ जे ओह्औंदी 11 नवम्बर थमां जम्मू आले सिविल सचिवालय च अपनी हाजरी जकीनी बनान। हुक्म च इब्बी आखेआ गेआ ऐ जे कम्मकाज दिएं जरूरतें स्हाबै एह अधिकारी श्रीनगर सचिवालय च बी अपनी हाजरी जकीनी बनाउन।

<><><><><><>

Govt. Sardar Patel

सरकार नै सरदार पटेल हुंदी 150मीं जयंति सरबंधी समारोह मुख भरै च 2 बरें तोड़ी मनाने दा फैसला कीता ऐ। एह समारोह इस बरें थमां शुरू होआरदे न। एह फैसला सरदार पटेल हुंदे योगदान गी दिखदे होई लैता गेआ ऐ। केन्द्रीय गृहमंत्री अमित शाह होरें आखेआ जे इस समारोह गी सरदार पटेल हुंदी उपलब्धिएं ते भारत दी एकता दी भावना दे चेते दे तौर पर मनाया जा'रदा ऐ। सरदार पटेल हुंदे योगदान गी चेता करदे होई शाह होरें आखेआ जे दुनिया दे सब्बने थमां मजबूत लोकतंत्र गी स्थापत करने च उनें अहम भूमिका नभाई। उनें कश्मीर थमां लक्ष्यद्वीप तोड़ी भारत गी अखंड बनाया।

<><><><><><>

PM-MKB

प्रधानमंत्री नरेन्द्र मोदी होर इस म्हीने दी 27 तरीक गी आकाशवाणी पर प्रसारत होने आले मन की बात कार्यक्रम राएं अपने बचार लोकें कन्नै सांझे करउन। एह इस कार्यक्रमै दी 115मीं किश्त होग। लोक इस कार्यक्रम लेई अपने बचार ते सुझाह टोल फ्री नंबर 1800—11—7800 पर सांझे करी सकदे न। लोक नमो ऐप जा फही My Gov Open Forum पर जाइयै बी अपने बचार ते सुझास सांझे करी सकदे न। एह सुझास कल यानि 25 अक्तूबर तगर दित्ते जाई सकदे न। एह कार्यक्रम आकाशवाणी ते दूरदर्शन दे समूलचे नेटवर्क AIR News ते न्यूज़ ऑन ए.आई.आर मोबाइल ऐप पर बी प्रसारत कीता जाग। इस कार्यक्रम दा लाइव प्रसारण आकाशवाणी समाचार, डी.डी. न्यूज़, प्रधानमंत्री हुंदे दफतर ते सूचना ते प्रसारण मंत्रालय दे यूट्यूब चैनलें पर बी कीता जाग। आकाशवाणी आसेआ हिंदी प्रसारण दे तुरत मगरा इस कार्यक्रम दा इलाकाई भाषाएं च अनुवाद बी प्रसारित कीता जाग।

<><><><><><>

Akhnoor Fire Crackers

प्रशासन नै अखनूर च स्थित पटाखें दे दऊं गोदाम सील करी दित्ते न। एसडीएम शुभांकर प्रत्युश पाठक हुंदी अगुवाई च जांच कीती गई जिस दरान एह पता लगगा जे एह लोक सुरक्षा सरबंधी हीलें गी नेई अपना करदे हे। एसडीएम अखनूर हुंदी अगुवाई च कमेटी नै

अम्बारन ते सुंगल मोड़ थाहर गोदामें दी जांच कीती ते इनें दौनें थाहरें पर लोड़चदे सुरक्षा सरबंधी हीले नेई कीते गेदे हे।

<><><><><><>

India-NZL Cricket Test

क्रिकेट च, अज्ज पुणे च भारत ते न्यूजीलैंड बश्कार खेड्डे जा'रदे मजूदा श्रृंखला दे दुए टेस्ट मैच च न्यूजीलैंड नै पैहले बल्लेबाजी करदे होई दपैहरी दी रूट्टी दे समें तकर विकटें दे नुकसान पररन्ज बनाई लैते न। भारती टीम नै इस मैच लेई टीम च त्रै बदलाव कीते न। मोहम्मद सिराज, कुलदीप यादव ते के.एल. राहुल दी थाहर आकाशदीप, वाशिंगटन सुंदर ते शुभमन गिल गी टीम च रक्खेआ गोआ ऐ। दुई बक्खी न्यूजीलैंड नै मैट हैनरी दी जगह मिचेल सैन्टनर गी टीम च थाहर दित्ती ऐ। पिच्छले 10एं ब'रें कोला बी मते समें थमां घरेलू पिच पर कोई बी टेस्ट श्रृंखला नेई हारने आहले भारत गी बैंगलुरु च खेड्डे गेदे इस श्रृंखला दे पैहले मैच च जबरदस्त झटका लग्गा जिसलै न्यूजीलैंड दे हत्था उसी 8 विकटें दी हार दा सामना करना पेआ हा ते इस दुए टैस्ट च जित्त हासल करियै भारत इस श्रृंखला गी बरोबरी पर आहनने दी पूरी कोश्ट करोग।

<><><><><><>